

EFESOFŌ Paulo Ovoli Kĩ Etsɛɛ ɛma Efesofo

^I Yĩ Paulo kĩ ñyadani Kristo Yesu foto ɔnyane ne Baguma kawɛ onukpɛ, letsɛɛ ovoli kĩĩ mamena mi Baguma bati ne Efeso a kĩ miadi ɔnokɔali ne mi kadzi kame, mikena ɔmɔa mɔ Kristo Yesu a.

^{II} Baguma boe ɔlega, mɔ boe ɔlate Yesu Kristo bemo mi kɔnya bekpa mi lukudo leme.

Baguma Hila Bati a Kĩ Bekena ɔmɔa Mɔ Kristo a.

^{III} Mifɔ bɔnye Baguma boe ɔlate Yesu Kristo ɔlega a kole, kitonekĩ ne ayekĩ bokena ɔmɔa mɔ Kristo sũ ni, ekpa boe hũhũ kame nhila adi nye adi kĩ edeĩ ne ode katinya a kame a.

^{IV} Fomɔ Baguma labɔa katinya malo ni, epau boe eyi kɔkɔɛ kĩ bóanya ye bade fɔtsã ɔmɔa kakena mɔ Kristo akũ, ayekĩ bóakena bati kpalɛwa kĩ nfumusu adima leláa be akũ ne ye aɛ.

^V Ayekĩ Baguma awe boe kale sũ ni, ehie kɔkɔɛ kĩ fɔatsã Kristo akũ yaakena boe ye babi. Ade fukĩ kɔũ nye ye kakona mɔ kawɔle a.

^{VI} Ne foesũ mifɔ bumu Baguma, ne kɔnya baũ a kĩ emo boe faa etsãmena ye Obi kĩ yaátuno kale a akũ!

^{VII-VIII} Kitonekĩ fɔtsã Kristo baboane kawula kame sũ ni, bɔna kate, ade foe nye kĩ Baguma kɔa boe tokpa ete boe. Midã ayekĩ Baguma kɔnya a

kĩ emó boe, ekpa boe nyansã mo fotsa kayokanu a pɔnɛ!

IX Baguma fɔ bunyi nhihie a kĩ ekena ekola eyi anɛ kɔkɔɛ, kĩ yaawũna etsãmena Kristo akũ a.

X Nhihie a nye kĩ nte lokɔ a wo ɔto ni, Baguma aakpɔta letsa nye letsa a kĩ eboɔ nɛ tite mo ode a ekɔa edo nɛ Kristo kayo.

XI Baguma fɔ bekena letsa nye letsa nɛ ye kawɛ mo nhihie onukpɛ. Ade epau boe kĩ bɔnya ye moawɛ bati nɛ ɔmoɔ kakena mo Kristo kame, nɛ ye kawɛ mo kalekayi, nɛ kayokayi a onukpɛ.

XII Nɛ foesũ mifɔ boe a kĩ bɔnya loto boadã Kristo anɛ a, bumu Baguma kukũkpale a.

XIII Ade mi malo, kĩ minu ɔnokɔali kale a kĩ kenye Kale Wĩ a, kĩ kema mi nkpã kate a, midani Baguma bati. Ayekĩ mite Kristo mido sũ ni, Baguma kɔa Hũhũ Kpalɛwa a kĩ elɛ eyi a eyi mi ɔsũ kĩ minya ye bade.

XIV Hũhũ Kpalɛwa kĩ nye kasipi kĩ bóate letsa a kĩ Baguma le eyi ekpa ye bati a. Kasipi kĩ akpa boe anɛ kate kĩ Baguma aakpa bati a kĩ benye ye bade a akũ akũ kadzi. Mifɔ bumu ye kukũkpale a!

Mpaɛ Kĩ Paulo Bɔa.

XV Nɛ fukĩ sũ, kito anɛ kĩ nnu kĩ mite boe ɔlate Yesu mido, miawɛ Baguma bati a flee kale a,

XVI ntáfɔ Baguma kɔle kanye nɛ mi lolɔ. Mate anɛ nɛ mi akũ nɛ yĩ mpaɛbo kame,

XVII ade mawã Baguma, boe ɔlate Yesu Kristo ɔlega, kĩ enye kukũkpale flee a, kĩ ekpa mi Hũhũ a kĩ yaakpa mi nyansã, enye Baguma etsa mi ayekĩ míanyi ye kanyi wĩ.

XVIII Make Baguma aduli kī ebinya mi anε mipuli mimo ye ohaĩ a, ayekī míanyi letsa a kī de akū εve mi ekpa kī midā anε a. Ye awāwā nhila a kī εle eyi kī yaakpa ye bati a kī bekpale be akū a ate koya paa.

XIX Midā ayekī ye kobē kpale a akena adzuma ne boe a kī bote ye budo a kame. Kobē kī kī koakena adzuma ne boe kame a,

XX ketimo kobē a kī Baguma kōa edzela Kristo etomena kanokpa, ekōa ye edzina ne ye somona ne ode flee a.

XXI Ade awā Kristo anya legā ne ode fogā flee, bati kī bideĩ otumi flee, bati kī bideĩ kobē flee mo balate flee akū a. Ye legā kadzakō bē legā nye legā kadzakō ne katinya kī mo kikī kaaya a kame.

XXII Baguma kōa letsa nye letsa edo ne Kristo aboa kayo ade ekōa ye ekpa asoli a nde ye lolō ne fotsa flee kame a.

XXIII Asoli kī nye Kristo sukena, kī sefō asoli a kpola, ade Kristo moawe leme afō letsa nye letsa akpola ne kako nye kako a.

II

Botsā Kristo Akū Bona Nkpā.

I Kokoε a, ne mi ato osi mo tokpa sū ni, miku ne hūhū kame.

II Ne loko na kame a, midzi nkpā ne katinya kame tisi akū. Mikōa akū mikpa kobē a kī koanya legā ne owe kame hūhū a akū a. Ade koe nye hūhū a kī finyaa yakena adzuma ne bati a kī baátse Baguma oledo a kame a.

III Ne ɔnɔkɔali kame ni, boe flee bona nde be, budzi nkpã ne boe sukena fɔwetsa onukpẽ, bɔkakena fɔtsa a kɔ boe sukena mɔ adzuni awe a. Ne katinya kame ɔbla kpa a kɔ edeɪ ne boe kame sũ ni, Baguma na kalɔkpa ne boe akũ nde ayekĩ ena ne batidziwa kasinu flee a akũ a.

IV Leme kɔ Baguma deɪ kɔnyakamɔ, mɔ ɔɔɔ baũ ekpa boe sũ ni,

V titɔ kɔ boe tɔkpa fɔ buku ne hũhũ kame malo a, efɔ bona nkpã ne Kristo kame. Baguma semekale odi sũ mina nkpã kate.

VI Ayekĩ bɔkena ɔmɔa mɔ Yesu Kristo sũ ni, Baguma dzela boe mɔ ye etomena kanɔkpa kɔ bɔnya legã mɔ ye ne ode.

VII Baguma kena fukɔ kɔ yanye ye semekale baũ a kɔ edeɪ ekpa boe ne lɔkɔ flee kame a, ne ayekĩ edeɪ ɔɔɔ ekpa boe ne Kristo sũ a.

VIII-IX Baguma semekale odi, mɔ mi katekado akũ fɔtsã sũ mina kate. Nné mi mɔawe mbɔdi kabɔa kame futo, mbom Baguma futetsa fɔane kɔ odima leláapuli ekɔa foe epia.

X Baguma leɔa boe mɔ ye mɔawe awe, kɔ bɔkena ɔmɔa mɔ Kristo Yesu, budzi nkpã bɔkena adzuma wĩ a kɔ ye mɔawe a ekɔa eyi kɔ bɔyaakena a.

Bats Badone a Flee Kena Ɔmɔa Mɔ Kristo.

XI Mite ane kɔ kɔkɔe a, nné Yudafɔ babi miane. Yudafɔ a kɔ bitsua fɔkpati a avũna mi kɔ bati kɔ betátsua fɔkpati. Leme lekpati katsua nye sukena katsua keke, kɔ otidziwa lekɔa awe ekena foe.

XII Mite ane kɔ ne lɔkɔ na kame a, mina mɔ lugo ne Kristo sekẽ. Minya banɔvɔẽ kɔ betána ne bati

a kī Baguma pau a kame. Mitána ne apam a kī Baguma kena mo fotsa a kī ele eyi ekpa ye bati a kame. Midzi ne katinya kame kī mitána ane kate ne letsama akū, ade mitána Baguma adima a.

XIII Leme finyaakī fotsā Kristo Yesu wuda kame bekpā mi a kī mina mo lugo a mifuā miyakena omoa mo Kristo.

XIV Kitonekī Kristo moawe a lekōa lukudo ema boe, ekena bikī benye Yudafō mo bikī benye Yudafō a omoa. Ekōa ye moawe sukena enye likesī nde seebi a ne be kayite.

XV Ewola Yudafō mbla mo ye akū temanie a, ayekī yaakpota bati kutsu nviā a bekena oti voē moa mo ye, lokōa lukudo leya.

XVI Kristo tsā ye wuda ne asendua akū a kame ewola likesī a kī lideī ne be kame a. Eboomu fude nviā a, bekena omoa ade bedani beya ne Baguma sekē a.

XVII Foesū Kristo yade letsā ne Kale Wī a lukudo akū ekpa bati flee, bikī benye Yudafō a kī bena mo lugo ne Baguma sekē a, mo Yudafō a kī bifuā Baguma a.

XVIII Kristo akū fotsā mo boe a kī bonye Yudafō mo bikī benye Yudafō a bóapuli botsā Hūhū a akū boya ne Olega a sekē.

XIX Ne foesū ni, mi a kī minyé Yudafō a mibuki minyé basitsāne iye banovoē, mbom finyaa mimō Baguma bati a midani kade moa bati mo Baguma kōla babi.

XX Bike mi malo mite ne seebi seyode a kī foto banyane mo Baguma onukpē banyene a ke a akū, ade Kristo Yesu moawe nyé kōla a akū de titiliwu a.

XXI Ade ye pini kōla akū fōtsa a flee ekpota a, kafō kōabo ane kakena nde afōlie kōla kpalewa kakpa Baguma a.

XXII Ne mi ɔmɔa kakena mɔ Kristo kame a, bekɔa mi malo bibumɔ be nkae a bake kōla a kī Baguma aadzi ne Hūhū kame a.

III

Paulo Kena Adzuma Ne Bikī Benyé Yudafo a Kame.

^I Ne fukī sū ni, yī, Paulo, kī bido ne kōla ne Kristo Yesu mɔ mi a kī minyé Yudafo a sū, mabɔa mpaɛ kakpa Baguma.

^{II} Mate kado kī minu ayekī Baguma mɔ yī kɔnya, ekpa yī adzuma kī kī nkena nkpa mi kale.

^{III} Nde ayekī ntsɛle foe lukū mma mi īyatē a, Baguma nye ye nhihie a kī ekena ekola a etsa yī.

^{IV} Nte miakā ovoli a ni, miapuli mimó ayekī nnu Kristo fōtsa kōlawa a kayo.

^V Ne kɔkɔɛ lɔkɔ a, Baguma tányɛ nhihie kōlawa kī etsa batidziwa, leme finyaa ni, Baguma nye foe etsa etsāmena Hūhū a akū ekpa ye fɔto banyane kpalewa mɔ Baguma onukpē banyene a.

^{VI} Nhihie kōlawa a nye kī fōtsā Kale Wī a akū bikī benyé Yudafo a leme kena nde Yudafo aye. Bekena sukena mɔape a bati, kī bena tsefā ne letsa a kī Baguma le eyi etsāmena Kristo Yesu akū a kame.

^{VII} Baguma tsā ye kɔbē akū emɔ yī kɔnya ekɔa yī ekena Kale Wī kī ɔsumune.

^{VIII} Tito kī īnye obisēde kōlaa ne Baguma bati a kame malo ni, Baguma mɔ yī kɔnya kī nkɔa

fōtsa wĩ beblebee a kĩ fudeĩ ne Kristo kame, kĩ fote kōya baũ leme a nde letsã nkpa bikĩ benyẽ Yudafō a.

IX Ade edo yĩ kĩ nfō bati flee binyi ayekĩ Baguma nihinie kolawa a aane kanya ekena adzuma. Baguma kĩ ye nye fōtsa flee ɔboane a, kōa fōtsa ekola ane kōkōe,

X ayekĩ ne finyaa lokō kame, baatsã asoli bati a akũ benyẽ Baguma nyansã aholo aholo a betsa fōgã mō otumifō a kĩ banya akũ ne ode katinya kame a.

XI Fukĩ nye Baguma nihinie kĩ elá kawũna a kĩ ekena eyi ane kōkōe, ade fōtsã boe ɔlate Yesu Kristo akũ fōya ne foe kame a.

XII Ayekĩ bōkena omōa mō Kristo, bote ye budo leme sũ ni, budeĩ ɔwole kado kĩ bōapuli bōnaa Baguma ane faa.

XIII Ne foesũ make mi aduli, mitafō akpō liveli mi ne lubo a kĩ mamō ne mi lolō a sũ, kitonekĩ foe flee fōanya mi nfasō.

Ayekĩ Kristo Awe Boe Kale.

XIV Ne fukĩ sũ ni, nke aduli mabōa mpae ne boe ɔlega a,

XV kĩ ela katete kadi nye kadi ne tite mō ode ane. Ade ye ate ke dĩ leme a.

XVI Mabao mpae kĩ Baguma etsã ye Hũhũ akũ edo mi ɔwole kame kōbẽ a kĩ kudeĩ ne ye kukũkpale beblebee kame a.

XVII Mabōa mpae kĩ mi katekado kefō Kristo ena ne mi kame. Mabōa mpae leme kĩ midza pintii ne ɔdō kame,

XVIII ayekĩ mi mo Baguma bati a flee míana kóbě minu Kristo odo a kadzele mo ye lugo, ye kade mo kadzũ a kayo.

XIX Baguma efõ miyaanyi Kristo odo a, tito kĩ otidziwa leláapuli enu foe kayo dzununuunu eyua malo, ayekĩ Baguma kutidu a aate mi kame flee.

XX Baguma a kĩ yapuli kakena fukĩ boavia a flee mo fukĩ boakena a, ne kóbě a kĩ koakena adzuma ne boe kame a,

XXI ade ye kade nye kamu ne asoli bati a mo Kristo Yesu kame, fónaa kasinu flee kame, kito finyaakĩ kanaa daa daa! Foya lomó.

IV

Bonye Oti Mwa Ne Kristo Kame.

I Foesũ yĩ a kĩ nwaa kola ne ayekĩ masum boe Olate sũ a, makpa mi kode kĩ midzi nkpã a kĩ yaaketi mo ayekĩ Baguma ve mi kĩ midzi a.

II Midola mi akũ, minya bati dowa, mina owole bõee. Minye mi odo mitsa ne mi kame ne owole bõee kana kame.

III Ne ayekĩ mikena omwa mo Hũhũ a sũ ni, mibwa mbodi mipi omwa kakena midomo akũ ne lukudo kame.

IV Sukena moape mo Hũhũ moape deĩ, ade ayea budeĩ konete ne letsa moape a kĩ Baguma ve boe ekpa a akũ a.

V Olate moape mo katekado moape deĩ, ade mui kawola moape lemẽ deĩ a.

VI Ade ayea budeĩ Baguma moape, batidziwa flee Olega kĩ enye letsa nye letsa Olate a. Yakena

adzuma katsãmena boe flee akũ, ade edeĩ ne boe flee kame a.

VII Boe kame odi nye odi te futetsa potii fudi kĩ fuketimo konyakamo a kĩ Kristo kpa a.

VIII Nde ayekĩ Katsɛɛ Kpalɛwa a le kĩ,
 “Kĩ ede enaa ode flee a, ekpã bati pii a kĩ bideĩ
 ne ndom kame a ebumo ye akũ,
 esẽ futetsa ekpa batidziwa.”

IX Finyaa, kĩ beɛ kĩ ede enaa ode flee a ni, foe kayo nye litsa? Foe kame kpale kĩ enya loto eka enaa tite oda flee a.

X Foesũ oti a kĩ eka enaa tite oda flee a, ade ye moape a lide enaa ode flee a, ayekĩ yaate katinya flee a kame.

XI Ade ye lite batidziwa futetsa, epau bati kĩ benya foto banyane, babebã onukpẽ banyene, badi letsã badene, badi benya bate badone akũ badãmenane mo fotsa batsane.

XII Ekena fukĩ ayekĩ yaalola Baguma bati a flee ekpa Kristo adzuma kakena, lokoa bido Kristo sukena a kĩ senye asoli bati a kobẽ.

XIII Foesũ boe flee bókakena omoa ne boe katɛkado kame, lokoa bunyi Baguma Obi a leme. Fófã bubo ane buketi mo Kristo, bona ye kutitse flee a.

XIV Lokoa boláabuki bonya nde babisẽ kĩ bavãlevã fotsa katsa vɔẽ fudi nye fudi aboa be katomena katẽmena nde owe aye, ade tedake bati ake be kado ne be adzuni tokpa kame a.

XV Ne foe kadokõ ni, nte boale onokoli ne odo kame ni, kene kĩ bubo ane ne osi nye osi akũ ne Kristo kĩ enye lolu a kame.

XVI Ade ye pini sukena fotsakõ fotsakõ mo tisĩ foatsa mo akũ kakena adzuma a. Foesũ nte

sukena kako nye kako akena se adzuma nde ayekĩ kefeta ni, oti mɔawe a abo ane kana ɔsĩ ne ɔdo kame.

Nkpã Vɔẽ Kadzi Ne Kristo Kame.

^{XXVII} Foesũ mabi mi ne boe ɔlate dĩ akũ kĩ mitabuki midzi nkpã nde bati a kĩ binyína Baguma, kĩ be adzuni adã faa faa,

^{XXVIII} ade be lolɔ kame mɔ fɔletsã kayɔkanu leme deĩ ne ɔtũ kame a. Ayekĩ binyína letsama, bideĩ ato ɔsĩ leme sũ ni, nkpã a kĩ bidzi a táketi mɔ nkpã a kĩ Baguma awe kĩ ye bati bidzi a.

^{XXIX} Bibuki belá konyɔã ne letsama akũ, foesũ bekoã be akũ bekpa tɔkpa mɔ fɔtsã kumekume a kĩ fɔado akũ efĩ kakena.

^{XX} Midã, nné fɔtsã kĩĩ odu mikɔle ne Kristo akũ!

^{XXI} Fɔnye ɔnokɔali kĩ minu Yesu nkã, ade nde bati kĩ bitomena ye ni, betsa mi ɔnokɔali a kĩ edeĩ ne ye kame a.

^{XXII} Foesũ mifone mi ɔbla kpa kɔe a kĩ midzi mitẽ a awe. Fɔwetsã kĩ fɔake bati libula mi nkpã a kĩ midzi tɔ a kade.

^{XXIII} Midani mi towɔle mɔ mi adzuni kame fɔkena fɔtsã vɔẽ,

^{XXIV} mibɔã ɔbla vɔẽ kĩ elã nde Baguma kutidu a, kĩ yanye akũ katsã ne nkpã wĩ kĩ ekpalẽ kame a aye. Ena ne mi akũ nde atadiẽ aye.

^{XXV} Foesũ mifɔ fɔvã kama! Kene kĩ odi nye odi edi ɔnokɔali ekpa ye ɔkɔba ɔte odone, kitonekĩ boe flee bɔnye Kristo sukena a akũ seke sidi.

^{XXVI} Nte mina kalokpa ni, mitafɔ kalokpa lefɔ mikena tɔkpa, ade mitafɔ kade ledɔ ne mi kalokpa a akũ.

XXVII Mitakpa Abonsam osi odima.

XXVIII Oti a kī ekaye a efō kaye. Ekōa awe ekena adzuma ayekī yaana enya ne foe kame, ete ahiāfō lemε fōtsa.

XXIX Mitafō tuwuli kpa lenε ne mi onukpē, mbom mile tuwuli wī kī taabumō bati a kī batse mi ne lōkō a odu kame a, lōkōa fōvele nhila fōma be.

XXX Mitakena letsa a kī laawo Baguma Hūhū Kpalēwa a kalōε, kitonekī Hūhū a Baguma kōa eyi mi osū, esipi kī Baguma aate mi ne Luwi nkaε a akū.

XXXI Mifōne kako kate awe, minye kalōkpa mō likesī ne mi kame. Ade ayea mifō awūni mō bati buī kanye, mō adzuni kpa kakena ne bati akū a.

XXXII Ne foe kadokō ni, mikena semε kale mina owōle bōεε mikpa akū. Mikōa tōkpa mite akū ndε ayekī Baguma lemε kōa ete mi etsāmena Kristo akū a.

V

Kene Kī Bōadzi Ne Jhaī a Kame.

I Ayekī minye Baguma babi kī yawε kale sū ni, kene kī miabōa mbōdi mina ndε ye aye.

II Kene kī odo enya mi kadzi kame akū ndε ayekī Kristo wε boe kale, ekōa ye akū ekpa ne boe lolō ndε futetsa mō olē kī bekōa bebōa bekpā Baguma, fuwo ye anε.

III Ne ayekī minye babi kī bekpale be akū sū ni, ketāfeta kī adōpaa, efīī fōtsa mō anengbā lekenana anε ne mi kame malo.

IV Ade ayea ketāne kī miale okendze tuwuli, tuwuli kī taāle katse, iye kī takō konyōā. Ne fukīī kadokō ni, mikaanye Baguma kolε.

V Minu foe kayo kī odi nye odi kī yaboa adopaa, yado ye akū efiī, mo edei anengbā, kitonekī anengbā keti mo baviō kasum a, elāana tsefā ne Kristo mo Baguma legākanyakō a kame da.

VI Mitafō odima lekōa tokōsia tuwuli eke mi, kitonekī ade foe bame sū Baguma soto kavele aaya ne bikī bidei ato osi a akū a.

VII Foesū mimo bati a na odu mitakena omoa.

VIII Kitonekī, mi moawe a mina ne otū kame tō, leme finyaa kī midani boe Olate bati sū ni, midei ne ohaī kame. Foesū midzi nkpā nde bati kī bidei ne ohaī kame,

IX kitonekī fotsa wī a kī nkpā kadzi ne ohaī kame ayamena nye tuwī kakena, kadzi ne osi kpīī akū mo onokwali kadi.

X Miboa mbodi mikole letsa a kī lawo boe Olate a ane.

XI Mitado akū ne fotsa kpa a kī bati akena ne otū kame a kame, mbom minye foe miwela,

XII kitonekī fonye konyoā kī bale kodzela ne letsa a kī bakena ne kabela kame a akū malo.

XIII Ade nte benye fotsa flee biko ne ohaī kame ni, bamo foe kutidu kamō wī,

XIV kitonekī letsa nye letsa kī benye kanya ni, liwo ne ohaī kame. Ade foesū Katsēle Kpalewa a le kī,

“Nyinya, no kī owaa tida a,

yidza kato kanokpa,

lokōa Kristo ohaī a aako ne no akū.”

XV Foesū midā kadā wī ne ayekī midzi nkpā akū. Mitadzi nde bati kī binyina kadi, mbom midzi nde anyansāfo aye.

XVI Mikena osi nye osi kī mina finyaa akū adzuma kakena wī, kitonekī budeĩ ne tokpa kakena fuwi kame.

XVII Ne foesū mitakena mi akū badzimbifo, mbom miboa mbodi kī míanu letsa a kī boe ɔlate awe kī mikena a kayo.

XVIII Mitamoa bave miwuga, kitonekī foafõ oti akena fotsa kpa, mbom mifõ Hühü a ete mi kame flee.

XIX Mikoa foletsa a kī fudeĩ ne Psalomo Ovoli, asoli tɔno mo hühü kame tɔno milomena mo akū. Misā kamu tɔno mo kawole tɔno mikpa boe ɔlate ne mi tɔwole kame.

XX Minye Baguma boe ɔlega kole daa ne letsa nye letsa kame, ne boe ɔlate Yesu Kristo dī akū.

Batsõ Mo Banyo Bidzi Nde Bate Badone Aye.

XXI Ayekī miakoa obu kakpa Kristo sū ni, kene kī miadolā mi akū mikpa akū.

XXII Mi batsole kī bidzi fonyo, midola mi akū mikpa mi banyo nde ayekī miadolā akū kakpa boe ɔlate a,

XXIII kitonekī onyole nye lolō ekpa otsõ nde ayekī Kristo leme nye asoli a lolō. Asoli bati a nye Kristo sukena, ade Kristo moawe a nye ye ɔtene a.

XXIV Ne foesū batsole bedola be akū ne letsa nye letsa kame bekpa banyo, nde ayekī asoli bati a leme adola be akū kakpa Kristo a.

XXV Mi banyo, miwe mi batsõ kale nde ayekī Kristo we asoli bati a kale, ekoa ye nkpā ekpa ne ye lolō.

XXVI Ekena fukĩ yakwa ekpale asoli bati a akũ, ne kĩ ekwa ye kale ekpale be akũ, nde ayekĩ bawola oti mui a aye.

XXVII Ewe kĩ asoli bati a kĩ yaakwa ekpa ye a akũ bekpale yededeede, bele kadã, ãye tuduli, ãye katsiĩtsiĩ, mo efĩ adima etana ne be akũ.

XXVIII Ade ayea kene kĩ banyole bewe be batsõ kale nde ayekĩ bawe be moawe sukena kale a. Onyole kĩ yawe otsõ kale ni, ye moawe akũ ewe kale.

XXIX Odima lákesi ye moawe sukena, mbom yadoola se, kadã se kadã wĩ, nde ayekĩ Kristo leme adãmena asoli bati a akũ,

XXX kitonekĩ ye sukena a akũ fokw fudi boane.

XXXI Katsere Kpalewa a le kĩ, “Ne fukĩ sũ onyole aafone olega mo oma eyi ekwa akũ emena mo otsõ, lokwa be nviã a bekena oti moa.”

XXXII Onokwali a kĩ ebela ne Baguma kale kĩ kame a dzũ paa. Manu foe kayo kĩ Kristo mo asoli bati a omoa kakena bale.

XXXIII Leme foatamo mi malo. Mi kame odi nye odi ewe otsõ kale nde ayekĩ yawe ye akũ kale, ade ayea mi kame odi nye odi leme ebu onyo a.

VI

Ayekĩ Bamanẽ Mo Babi Adzi Nkpã.

I Mi babisẽ, mibu mi bamanẽ, kitonekĩ Kristo kame lekenana wĩ foane kĩ miakena.

II Mbla atonyade kĩ nfaso deĩ ne ye akũ nye kĩ, “Bu aga mo ama,

III ayekĩ no kadzi kame aale, odzi nkpã geleele ne tite akũ.”

IV Mi balega, mitakado mi babi kalokpa, mbom midoola be kadoola wĩ, mivele be, mikpa be kode ne boe ɔlate osi a akũ.

Kene Kĩ Basate Mo Balate Bidzi Kadzi Wĩ.

V Mi basate, mibu mi tite akũ balate ne libe mo kukũtila kame. Mikena foe mo mi towole flee nde ayekĩ miasum Kristo.

VI Mitakena foe ane kame keke kasum, ayekĩ baamu mi sũ, mbom nde Kristo basumune aye ni, mikena letsa a kĩ Baguma awe a futo mi towole flee kame.

VII Mikena mi basate tudzuma ne kawole kame nde boe ɔlate miasum, kĩ nné batidziwa miasum.

VIII Mite ane kĩ boe ɔlate aase odi nye odi koto ne adzuma wĩ a kĩ ekena a akũ, nte enye osate iye edzi ye akũ akũ.

IX Mi balate leme, kene kĩ miakena foe lomɔ mikpa mi basate, lokoa mifɔ be libe kado. Mite ane kĩ mi atsu nviã a flee ɔlate moape mideĩ ne ode, kĩ yaadzemo odi nye odi, ade elaadã odima ane a.

Mido Hũhũ Kame Kawũkano Fotsa.

X Ke kawũna kame a, mi omɔa kakena mo boe ɔlate ena osĩ ebu, fotsã ye kobẽ kpale akũ.

XI Mibla kawũkano fotsa flee a kĩ Baguma kpa mi a, ayekĩ miapuli miyidza midza ne Abonsam tedake tisi a akũ.

XII Kitonekĩ nné bomó batidziwa lamena kawũkano, mbom bomó ablo hũhũ kpa kĩ edeĩ kobẽ ne owe kame, hũhũ kĩ yanya akũ, hũhũ kĩ edeĩ otumi, mo hũhũ kpa kĩ edeĩ ne otũ katinya kĩ kame lamɔ kano.

XIII Foesũ mibla Baguma kawũkano fotsa flee a finyaa, ayekĩ nte Luwi kpa a ya ni, miapuli midza

mino kawũ a minaawũna, mibuki mina kobẽ ne mi kame.

XIV Foesũ mina ne kukũmane kame, mikoa onokwali miboa aboso, mikoa tuwĩ kakena misua mi owole nde towole libii kate sobotsae aye.

XV Ade mina ne kukũmane kame mile lukudo Kale Wĩ a kĩ kenye mi kawũkano tepambua kĩ miado.

XVI Lokoo nye lokoo ni, mile katekado nde fubii kate sobotsae, kitoneki ade foe boakoa budina fubii mo fi a kĩ Okesine a atale a.

XVII Mitsa Baguma nkpã kate a nde sobotsae loboe aye, mile Baguma kale a nde lepame geleele kĩ Hũhũ a koo edo ne mi awe.

XVIII Mikena fukii flee ne mpaebo kame, mikaavia Baguma kabumena. Mifoo Hũhũ a ekpã mi miboa mpaee ne letsa nye letsa kame. Ne foesũ ni, mina ne kukũmane kame, mitafoo akpo liveli mi. Miboa mpaee daa ne bati a kĩ bekpale be akũ a flee loloo.

XIX Miboa mpaee ne yi malo loloo kĩ Baguma edo yi foletsa wi ne onukpe, ayeki nte maale kodzela ni, maapuli ndo owole inye Kale Wĩ foletsa kolawa a ntsa bati.

XX Baguma Kale Wĩ kii foto onyane mane su, ade foesũ nwaa kola malo a. Miboa mpaee mikpa yi kĩ mpuli ndo owole nle Kale Wĩ a nde ayeki fofeta.

Paulo Kawõna Nkae.

XXI Tihiko, boe owaee paa, kĩ enye boe Olate adzuma wi okenane a, aaya ne awã, ebi mi yi akũ foletsa, efoo minyi ayeki nlamena adzuma a.

XXII Kado ndo ye ne mi sekẽ kĩ ɣyaabi mi ayekĩ boe flee bɔlamena adzuma ne awĩ, lɔkɔa edo mi kɔbẽ lemɛ.

XXIII Baguma boe ɔlega mɔ boe ɔlate Yesu Kristo bekpa boe bawã a flee lukudɔ, ɔdɔ mɔ katɛkado.

XXIV Baguma emɔ be flee a kĩ bekɔa ɔdɔ kĩ ɛla kawũna a bawɛ boe ɔlate Yesu Kristo kalɛ a konya.

Baguma Apam Vɔɛ a Tuwuli
Tuwuli: Baguma Apam Vɔɛ a Tuwuli New Testament
copyright © 2008 Wycliffe Bible Translators, Inc.

Language: (Tuwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 28 Dec 2024 from source
files dated 29 Jan 2022

68df0193-2981-5275-8994-8f743fe01e5e